



© HANS STRICKER

## Tranteren

DA FLAVIA HOBI

■ **Sche nus giain ensemen a far shopping sai jau en ina butia da vestgadira immediat dir a tai tge che ma plascha. Il medem tar ils chalzers, las tastgas, ils accessoris.**

Ma abstrahà da chaussas materialas – jau admir persunas ch'han gia adina savì ch'ellas vulan daventar advocata, scrinaria, media. Tar mai è quai in pau auter. Jau fashess uschè bler gugent ed hai perquai adina puspè novas ideas per occupaziuns interessantas. Gea, tge vi jau atgnamain da la vita che porscha a nus pussaivladads en massa? Il pled tudestg «Entscheidung» di en sasez gia ch'ins sa separa cun mintga decisiun dad insatge. Tgi che fa ina decisiun seriusa serra conscientamain l'access ad autras pussaivladads. Tgi che na sa decida dentant betg blochescha forsa sia creschientscha, ses svilup. Sa separar dad insatge pretenda dentant curaschi e per part betg pauc. Durant s'occupar cun teorias differentas da far decisiuns hai jau chattà en in NZZ Folio gia pli vegl in interessant artigel recumandabel cun tips davart il sa decider: Nagina tema da las consequenzas, disfidar a l'agen giudicat, far atenziun dad in-

furmaziuns irrelevantas, betg deplorar perditas, sa fidar dad instincts, resguardar ses sentiments, vesair las chaussas ord perspectivas differentas, limitar sia schelta, laschar decider auters per sasez. Tuna tut bain, intelligent, raschunaivel, schebain insaco detg simpel. En mintga cas vi jau empruvar pli e pli dad integrar e da realisar quests tips en il futur. Avant curt m'ha ditg ina dunna da 40 onns ch'ella veglia emprender da tadlar dapli sin sia intuziun. Gea, sch'i constat cun chau, venter e cor è quai franc bel. Bel è era ch'ins vegn adina puspè en contact cun persunas inspirantas e nunspegtadamaing sa dat ina decisiun da sasez u ch'i sa mussan tscherts basegns. Plinavant ans gida forsa da temp en temp il patratg che tut nossas decisiuns tranter la vita e la mort han in senn. Pia, independent da l'impurtanza e la consequenza, la proxima decisiun vegn a vegnir. La finala è la midada l'unica constanta en la vita – midadas che cumenzan cun ina decisiun. E fin ch'jau studegel enturn vi da tschertas decisiuns vom jau il meglier a cumprar chalzers... u ina tastga duvrass jau er exnum puspè ina giada!

**L'autura è pedagoga.**